

**Talamdan sa
Mga Mensahe alang sa Full-time Training
sa Fall Term sa 2022**

**LINANGKOB NGA HISGOTANAN:
MAGKINABUHI DIHA SA REALIDAD SA LAWAS NI CRISTO
SA PAGKAT-ON KANG CRISTO MAINGON NGA NAA NI JESUS ANG REALIDAD**

Mensahe 13

**Magkinabuhi diha sa Realidad sa Lawas ni Cristo sa Pagpahimulos kang Cristo
segun sa Tiunayng Kahulogan sa Awit sa Mga Awit aron Mahigugmaong
Makapakig-ambitay ni Cristo aron Maandam Nato ang Atong Kaugalingon
nga Mahimong Pangasaw-onon ni Cristo**

Basahong Kasulatan: A. A. 1:2-4; 2:8-9; 3:8-10; 4:12-16; 6:10, 13; 7:11; 8:13-14; Bug. 19:7-9;
Mat. 25:6-13

I. Ang hisgotanan sa Awit sa Mga Awit, nga balak, mao ang kasaysayan sa gugma sa maayo ka-ayong kaminyoon, nga nagpadayag sa nagkauswag nga kasinatian sa mahigugmaong pagpakig-ambitay sa tinagsang magtutuo kang Cristo aron maandam ang Iyang pangasaw-onon sa unom ka dagkong hugna—Bug. 19:7-9; Mat. 25:6-13; Bug. 3:18-22; Zac. 4:1-6, 11-14; 1 Juan 4:19; Sal. 110:3; 119:140; Buh. 20:31, 35:

A. Sa unang hugna sa Awit sa Mga Awit, gidani ang maghihigugma ni Cristo nga mopursigir Niya aron matagbaw (1:2—2:7); gusto ang Ginoo nga dunay personal, mabination, pribado, ug espirituhanong relasyon Niya ang matinguhaon Niya:

1. Personal ang *daniha ko* (1:4); niingon ang Ginoo nga, “Gibira Ko sila pinaagi sa mga lubid sa tawo, / Pinaagi sa mga bugkos sa gugma (Os. 11:4a); nagpakita kini nga gihigugma ta sa Dios sa dios-nong gugma Niya, dili sa pagkabutang sa pagkadios kondili sa pagkabutang sa pagka-tawo; ang mga lubid sa tawo nga pinaagi niini gidani ta sa Dios naglakip sa pagpakatawo ni Cristo, sa Iyang pagkinabuhi ingog tawo, pagkalansang sa krus, pagkabanhaw, ug pagkayab; pinaagi man ning tanang lakang ni Cristo sa pagka-tawo Niya nga personal nga nidangat kanato ang gugma sa Dios diha sa Iyang kaluwasan (Rom. 5:8; 1 Juan 4:9-10).
2. Mabination ang *pahaloka nako* (A. A. 1:2); sa motuo na ta ni Cristo aron madawat Siya nga dios-nong kinabuhi (Juan 1:4, 12), personal ug mabination gyod natong higugmaon si Cristo aron mopursigir ta Niya ug makapahimulos Niya nga katagbawan nato; gisugo ta sa Salmo 2:12 nga “haloki ang Anak”; ang paghalok kang Cristo pagpahimulos man Kaniya.
3. Sa pagpursigir sa matinguhaon kang Cristo gidala Niya siya ngadto sa iyang espiritu nga gipanganak na pag-usab ingon nga Labing Balaan sa tanan (iyang mga lawak—A. A. 1:4) aron makig-ambitay Niya; nagpasabot og pribadong relasyon sa Ginoo ang Iyang mga lawak.
4. Labot pa, kay giduaw man ta ni Cristo diha sa gipanganak pag-usab nga espiritu nato isip mga lawak Niya sa sulod, espirituhanon gyod ang relasyon nato Niya; pribado Siyang moduaw nato diha sa atong espiritu, espirituhanong moanhi nato, dili sa pisikal.
5. Ang tanang espirituhanong prinsipyo naa ning unang hugna sa madaogong kinabuhi sa matinguhaon sa Awit sa Mga Awit; dili bag-o ang mga pagtulon-ang sunod niini, daang mga pagtulonan hinuon kini nga mas lalom nga gibalikbalik; sa pag-anak pag-usab gipasulod ang binhi sa Dios kanato, ug naa ning binhia ang tanang kasinatian sa tibuok Cristohanong kinabuhi nato—1 Juan 3:9.

B. Sa ikaduhang hugna sa Awit sa Mga Awit, gitawag ang maghihigugma ni Cristo aron mahigawas sa kaugalingon pinaagi sa pagkausa niya sa krus ni Cristo—2:8—3:5:

1. Gihisgotan sa Awit sa Mga Awit 2:8-9 ang kalagsik sa pagkabanhaw; ning mga versiculoha gipakasama si Cristo sa lagsaw o sa nating osa nga “nagluksolukso sa kabukiran, nag-ulo-iniktin sa

kabungtoran”; nagpasabot sa mga kalisdanan ug mga kaulangan ang kabukiran ug kabungtoran, apan walay habog ra kaayo o dako ra ba kaayo nga makapahunong sa nabanhawng Cristo; magtinguha ug masayod gyod unta ta sa nagluksolukso-sa-bukid ug nag-ulo-iniktin-sa-bungtod nga presensya ni Cristo.

2. Nagsusi sa kaugalingon ang maghihigugma ni Cristo, nga nahimong pagpahilayo-gikan-sa-uban ingog bungbong nga nagpahilayo niya sa presensya ni Cristo (v. 9b); busa, gidasig siya ni Cristo nga mobangon ug mogula sa ubos niyang sitwasyon aron makig-uban Niya (v. 10).
 3. Nakadungog sab ang maghihigugma ni Cristo nga gisultian siya sa Ginoo nga niagi na ang panahon sa pagkawalay-buhat (tingtugnaw) ug nahuman na ang mga pagsulay (ulan) ug wala na (v. 11); gisultian sab Niya siya nga niabot na ang tingpamulak; busa, gihangyo ug gidasig siya sa Ginoo pinaagi sa malamboong kadato sa pagkabanhaw (vv. 12-13).
 4. Pinaagi man sa gahom sa pagkabanhaw, dili sa natural natong kinabuhi, nga mapahiuyon tang mga maghihigugma ni Cristo sa Iyang kamatayon sa pagkausa nato sa Iyang krus (vv. 14-15); ang realidad sa pagkabanhaw mao ang pneumaticong Cristo nga Espiritung nahingpit, nga nagpuyo ug nasagol sa gipanganak pag-usab nga espiritu nato; nianang nasagol nga espiritu makaambit ug makasinati ta sa pagkabanhaw ni Cristo, nga magpausa nato sa krus aron mahigawas ta sa kaugalingon ug matransporma nga mabag-ong tawo diha sa bag-ong kabuhatan sa Dios aron matuman ang pamatigayon sa Dios diha sa pagtukod sa organicong Lawas ni Cristo (Rom. 8:2, 4, 29; Gal. 6:15; 2 Cor. 5:17).
- C. Sa ikatulong hugna sa Awit sa Mga Awit, gitawag ang maghihigugma ni Cristo aron magkinabuhi diha sa pagkayab ingon nga bag-ong binuhat diha sa pagkabanhaw—3:6—5:1:
1. Ang pagkinabuhi diha sa pagkayab makanunayong pagkinabuhi man diha sa atong espiritu; magkinabuhi ngani ta diha sa atong espiritu, madugtung ta sa nikayab nga Cristo nga naa sa mga langit—Efe. 2:22; Gen. 28:12-17; Juan 1:51; Bug. 4:1-2; Heb. 4:12, 16 ug nota 1.
 2. “Naghimo si Haring Salomon alang sa iyang kaugalingon og palanquina / Gikan sa kahoy sa Lebanon. / Gihimo niya ang mga haligi niana gikan sa salapi, / Ang salog niana, sa bulawan; / Ang lingkoranan niana, sa purpura; / Gibakbakan ang taliwala niana sa gugma / Gikan sa mga anak nga babaye sa Jerusalem”—A. A. 3:9-10:
 - a. Pinaagi sa buhat sa pagtransporma sa Espiritu sa sulod nato, mahimo tang naglihok nga sudlanan ni Cristo, ang karwahe ni Cristo, ang “sakyanan” ni Cristo, alang sa lihok ni Cristo diha sa ug alang sa Lawas ni Cristo—itandi sa 2 Cor. 2:12-17.
 - b. Gitukod ta pag-usab sa Diosnong Trinidad aron nga ang dayag nga estruktura nato mao ang nabanhaw ug nikayab nga pagka-tawo ni Jesus, ug ang dayandayan nato sa sulod mao ang gugma nato sa Ginoo—A. A. 3:9-10.
 - c. “Gibakbakan sa gugma” gyod unta ang pagkatawo nato sa sulod (v. 10); ang paghigugma nato sa Ginoo mag-amping nato diha sa ginsakpan nga magbaton ni Cristo nga atong pagka-tawo, nga manalipod sa atong pagka-tawo diha sa nagpugong nga pagbati Niya—2 Cor. 5:14.
 - d. Tungod sa personal, mabination, pribado, ug espirituhanong paghigugma nato sa Ginoo, maguba ang natural nga pagkamao nato, ug mabag-o ang atong dagway pinaagi sa makatubos nga kamatayon ni Cristo (mga poste nga hinimo sa salapi), sa diosnong kinaiya sa Dios (salog), ug sa pagkahari ni Cristo nga Espiritung taghatag-og-kinabuhi nga nagbuot sa sulod nato (lingkoranan nga purpura)—A. A. 3:10; itandi sa Rom. 8:28-29; 2 Cor. 4:16-18.
 3. Tungod sa pagkinabuhi niya diha sa pagkayab ni Cristo ingon nga bag-ong binuhat diha sa pagkabanhaw, nahamtong ang maghihigugma ni Cristo diha sa kadato sa Iyang kinabuhi aron mahimo siyang tanaman alang ni Cristo alang sa pribadong pagpahimulos Niya (A. A. 4:12-15); giandam siya aron magpaalimyon sa kahumot ni Cristo sa bisan unsang sirkumstansya o palibot; gusto siya nga mobuhat nganha niya nga tanaman ang lisod nga palibot (amihan) ug ang hayahay nga palibot (habagat) aron mokatap ang kahumot niini (v. 16).
- D. Sa ikaupat nga hugna sa Awit sa Mga Awit, labi pa kakusganong gitawag ang maghihigugma ni Cristo nga magkinabuhi sulod sa tabil pinaagi sa krus human sa pagkabanhaw—5:2—6:13:

1. Tungod sa pagkinabuhi sulod sa tabil, natransporma ang maghihigugma ni Cristo nga nalangit-nong mga panon; naglantaw siya sama sa kadlawon, sama siya katahom sa Bulan, ug sama siya katin-aw sa Adlaw—v. 10:
 - a. Ang agianan sa mga mananaog sama sa banagbanag sa kadlawon, nga nag-anam kasanag hangtod sa pagkahingpit sa adlaw—Prov. 4:18; Juan 1:5.
 - b. Nagtimaan ni Cristo sa pag-anhi Niya ug sa pagkadasig nato pag-usab matag buntag ang banagbanag sa kadlawon, ang pagsubang sa Adlaw; sama sa pagbanagbanag sa Adlaw ang Cristohanong kinabuhi—Luc. 1:78; Prov. 4:18; Sal. 110:3; Huk. 5:31.
 2. Sa pagkahamtong sa kinabuhi ni Cristo, nahimong Shulamitanhon (ang binabaye sa “Salomon”) ang maghihigugma Niya, nga nagtimaan nga nasama na siya Niya sa kinabuhi, kinaiya, pagpa-dayag, ug kagamitan (apan dili sa ranggo sa pagka-Dios) nga kopya ug hulad ni Cristo nga mahi-angay Niya aron magminyo sila—A. A. 6:13; 2 Cor. 3:18.
 3. Gipakasama ang Shulamitanhon sa sayaw sa duha ka kampo, o duha ka kasundalohan (Heb. *mahanaim*), sa panan-aw sa Dios; human makita ni Jacob ang mga manulonda sa Dios, ang duha ka kasundalohan sa Dios, ginganlan niyang Mahanaim ang dapit nga nahimutangan niya ug gibahin ang iyang mga asawa, mga anak, ug mga katigayonan ngadto sa “duha ka kasundalohan”—A. A. 6:13; Gen. 32:1-2:
 - a. Ang espirituhanong kahulogan sa duha ka kasundalohan mao ang kusganong panghimatuod nga labi tang magmadaogon, “hilabihan gyod tang modaog,” pinaagi Niya nga nahigugma nato, segun sa prinsipyo sa Lawas ni Cristo—Rom. 8:37; 12:5.
 - b. Dili gusto ang Dios sa mga kusganon sa ilang kaugalingon; kadto rang mga mahuyang, mas maluyahon, mga babaye ug mga bata ang gusto Niya; ang maisip nga angayan mahimong mga mananaog mao ang mga mas maluyahon nga nagsalig sa Ginoo—1 Cor. 1:26-28; 2 Cor. 1:8-9; 12:9-10; 13:3-5.
- E. Sa ikalimang hugna sa Awit sa Mga Awit, niambit sa buhat sa Ginoo ang maghihigugma ni Cristo—7:1-13:
1. Sa versiculo 4 gibalik-tan-aw sa Espiritu ang katahom sa mahigugmaong matinguhaon diha sa mapasakopong pagbuot niya (liog) nga naumol tungod sa nagtranspormang buhat sa Espiritu pinaagi sa mga pag-antos aron matuman ang kabubut-on sa Dios, diha sa pagpadayag sa iyang kasingkasing, nga bukas sa kahayag, hinlo, puno sa pahulay, ug maduol (mga mata nga sama sa mga danawan—itandi sa 1:15; 4:1; 5:12), ug sa espirituhanong pagbati niya nga habog ug hait og pag-ila (ilong—itandi sa Fil. 1:9-10; Heb. 5:14).
 2. Nagpakita ang Awit sa Mga Awit 7:11 nga buot mobuhat ang maghihigugma ni Cristo uban sa iyang Hinigugma sa buhat nga alang sa tibuok kalibotan (kaumahan) pinaagi sa pagdumuluong sa usa ka dapit ngadto sa laing dapit (mopuyo sa kabalangayan); nagpakita kini nga dili siya mapundokpundokon sa pagbuhat sa buhat sa Ginoo; kanunay hinuon niyang gibuksan ang buhat, aron makaanha ug makadumuluong ang uban didto ug makaadto siya ug makadumuluong sa laing dapit; kini ang pagbaton og usa ka buhat diha sa usa ka Lawas.
 3. Ang pag-ambit sa buhat sa Ginoo pagbuhat man uban Niya (2 Cor. 6:1a); aron makabuhat uban Niya, gikinahanglan nato ang pagkahamtong sa kinabuhi, kinahanglan mausa ta Niya, ug alang gyod sa Iyang Lawas ang buhat nato (Col. 1:28-29; 1 Cor. 12:12-27).
 4. Nagbuhat ang Shulamitanhon isip kapikas ni Salomon, nangatiman sa tanang kaparasan (A. A. 8:11), sa kaiglesiahan ug sa mga magtutuo sa tibuok yuta; duna gyod unta tay buhat nga alang sa tibuok kalibotan; kini ang gibuhat ni Pablo sa pag-establisar og mga iglesia lokal ug unya nagbuhat siya aron madala sila sa hingpit nga pagkaila sa Lawas ni Cristo—Rom. 16:1-24.
 5. Niingon ang Awit sa Mga Awit 7:12 nga, “Mosayo ta pagbangon aron moadto sa kaparasan; / Tanawon nato kon namutot na ba ang paras, / Kon nibuklad na ba ang piyoos, / Kon namulak na ba ang mga granada; / Didto ihatag ko kanimo ang akong gugma”; ning panahona nadugtong na niya ang buhat sa Ginoo sa Ginoo mismo; makapadayag na siya karon sa iyang gugma sa Ginoo sa dapit sa Iyang buhat.

- F. Sa ikaunom nga hugna sa Awit sa Mga Awit, naglaom nga malalin ang maghihigugma ni Cristo (8:1-14); niabot siya gikan sa kamingawan (sa yutan-ong ginsakpan) nga “nagpauraray sa iyang hinigugma” (v. 5):
1. Nagpasabot ang *nagpauraray sa iyang hinigugma* nga, sama ni Jacob, gihikap na ang piyakpiyak sa iyang bat-ang, ug gibatokan na sa Ginoo ang natural niyang kusog—Gen. 32:24-25.
 2. Nagpasabot sab ang *nagpauraray sa iyang hinigugma* nga napalغان niya nga giduot siya sa hila-bihan gyod, ug morag molungtad kini hangtod matapos ang pagpanaw sa kamingawan—2 Cor. 1:9; 12:9-10; 13:3-4.
 3. Gihangyo niya ang iyang Hinigugma nga ibutang siya ingon nga timbre sa Iyang kasingkasing sa gugma ug ingon nga timbre sa Iyang bukton sa kusog; ning puntoha nabati niya nga wala gyod siyay kusog ug walay mahimo, ug nakaamgo siya nga nag-agad sa gugma ug nag-amping nga gahom sa Dios ang tanan—A. A. 8:6-7.
 4. Nihangyo ni Cristo ang maghihigugma Niya nga nagpuyo sa mga magtutuo nga mga tanaman Niya nga padunggon siya sa Iyang tingog—v. 13; itandi sa 4:13—5:1; 6:2:
 - a. Nagpakita kini nga sa buhat nga gibuhay nato alang sa Ginoo nga atong Hinigugma, padayon gyod tang makig-ambitay Niya, kanunayng maminaw Niya—Luc. 10:38-42.
 - b. Nag-agad sa mga pulong sa Ginoo ang atong kinabuhi, ug nag-agad sa mga sugo sa Ginoo ang atong buhat; ang sentrong punto sa atong mga pag-ampo mao gyod unta ang pagpangandoy nato sa pagpamulong sa Ginoo—Bug. 2:7; 1 Sam. 3:9-10; itandi sa Isa. 50:4-5; Exo. 21:6.
 - c. Kon wala ang mga pulong sa Ginoo, wala gyod tay pinadayag, kahayag, o subjectibong pagkaila ba ni Cristo nga misteryo sa Dios ug sa iglesia nga misteryo ni Cristo (Col. 2:2; Efe. 3:4-5; 5:32); hingpit gyong nag-agad sa pagpamulong sa Ginoo ang kinabuhi sa mga magtutuo (vv. 26-27).

II. Isip panghinapos nga pulong ning balaknong basahon, nag-ampo ang maghihigugma ni Cristo nga magdali unta sa pagbalik ang iyang Hinigugma diha sa gahom sa Iyang pagkabanhaw (lagsaw ug nating osa) aron ipahamutang ang tam-is ug matahom nga gingharian Niya (kabukiran sa mga igpahumot), nga molukop sa tibuok yuta—A. A. 8:14; Bug. 11:15; Dan. 2:35:

- A. Nagpakita kanang pag-ampo sa pagkausa ug panag-ambitay tali ni Cristo nga Pamanhonon ug sa Iyang mga maghihigugma nga pangasaw-onon diha sa gugma nila sa kasal, sa paagi nga ang pag-ampo ni Juan, nga maghihigugma ni Cristo, isip panghinapos nga pulong sa Balaang Kasulatan, nagpadayag sa walay kataposang pamatigayon sa Dios kalabot ni Cristo ug sa iglesia diha sa diosnong gugma Niya—Bug. 22:20.
- B. Ang “Ari na, Ginoong Jesus!” mao ang kataposang pag-ampo sa Biblia (v. 20); natapos ang tibuok Biblia sa tinguha nga moanhi ang Ginoo nga gipadayag ingog pag-ampo.
- C. “Inig-anhi Niya, mahimong mga kamatuoran ang pagtuo, ug pulihan sa pagdayeg ang pag-ampo. Mahingpit ang gugma sa walay kahanap nga kahingpitan, ug moalagad ta Niya sa walay sala nga ginsakpan. Unsang adlaway unya kana! Ginoong Jesus, pagdali sa pag-anhi!” (Watchman Nee, *The Collected Works of Watchman Nee*, vol. 23, “The Song of Songs,” p. 126).